



Broj: 01,03,03/11-05-1-381/16

Sarajevo, 9.3.2016.

## KOLEGIJIMA OBA DOMA PARLAMENTARNE SKUPŠTINE BiH

### KOMISIJI ZA VANJSKE POSLOVE PREDSTAVNIČKOG DOMA

### KOMISIJI ZA VANJSKU I TRGOVINSKU POLITIKU, CARINE, SAOBRAĆAJ I KOMUNIKACIJE DOMA NARODA

### ČLANOVIMA DELEGACIJE PSBiH U PARLAMENTARNOJ SKUPŠTINI UNIJE ZA MEDITERAN

### KOLEGIJU SEKRETARIJATA

### IZVJEŠTAJ SA SASTANKA KOMITETA ZA POLITIČKE POSLOVE, SIGURNOST I LJUDSKA PRAVA PARLAMENTARNE SKUPŠTINE UNIJE ZA MEDITERAN (PSUzM)

**Brisel, 29.2.2016. godine**

Na poziv **Renata Sorua, predsjedavajućeg Komiteta za političke poslove, sigurnost i ljudska prava Parlamentarne skupštine Unije za Mediteran**, održan je sastanak Komiteta u Briselu, 29.3.2016. U ime Parlamentarne skupštine BiH učestvovali su članovi Delegacije PSBiH u PSUzM: Hazim Rančić, predsjedavajući, i Diana Zelenika, zamjenica predsjedavajućeg, Amila Žujo, prevoditeljica, te sekretarka Delegacije Lara Borovina. Osim Bosne i Hercegovine, na sastanku su učestvovali članovi Evropskog parlamenta i članovi nacionalnih parlamenata zemalja članica PSUzM (Alžir, Austrija, Belgija, Bugarska, Njemačka, Grčka, Izrael, Italija, Jordan, Latvija, Luksemburg, Malta, Maroko, Palestina, Turska).

Nakon usvojenog dnevnog reda **Luis Negre, zamjenik predsjedavajućeg Komiteta** (u privremenom odsustvu gosp. Sorua), naglasio je tri glavne teme sastanka:

1. Formiranje Radne grupe za Palestinu i radni program Grupe, što je odlučeno prema Preporukama Komiteta na plenarnom zasjedanju u Lisabonu, u maju 2015. godine. Cilj Grupe je da podrži nastanak nezavisne, demokratske i održive Države Palestine, koja će funkcionirati u miru i sigurnosti sa Izraelom i njenim ostalim susjedima;
2. Rasprava o budućim aktivnostima Unije za Mediteran, razmjenom mišljenja sa zamjenicom generalnog sekretara UzM Delphine Borione;
3. Razmjena mišljenja o trenutnoj situaciji u Siriji, uticaj na stanovništvo i euromediterranske zemlje; uloga i podrška zemalja partnera PSUzM u Ženevskom

procesu; razmjena mišljenja s Michaelom Dochertyjem, šefom Sektora za Siriju, Liban i Jordan, Generalni direktorat Evropske komisije za politiku susjedstva i pregovore o proširenju (DG NEAR).

Također je obavijestio prisutne da je na sastanku Biroa PSUzM u Rabatu, 12. februara, odlučeno da naredno plenarno zasjedanje bude održano u Maroku, 10. i 11. juna 2016. godine.

U raspravi je **predstavnik palestinskog parlamenta Zuheir Sanduka** predstavio tešku situaciju u Palestini i brutalno ubijanje ljudi, te istaknuo da je životni standard u Palestini bio mnogo bolji prije potpisivanja sporazuma sa Izraelom. On je rekao da najviše Evropska unija može imati pozitivan uticaj po pitanju sukoba Palestine i Izraela, da Palestinci izražavaju želju da žive u miru sa susjedima u Izraelu, jer bi mir i sigurnost imali pozitivan uticaj na sve narode u regionu. Vjeruje da će dobiti nezavisnost i da će moći, zajedno sa susjedima u Izraelu, osigurati mir i sigurnost u regionu.

**Predstavnik Delegacije Izraela Erel Margalit** istaknuo je nepovoljnu situaciju na terenu, te pozvao palestinske vlasti da se vrate za pregovarački sto. Laburistička partija, koju predstavlja gosp. Margalit, želi kompromis, ekonomski razvoj; međutim ekonomski razvoj nije dovoljan, potrebno je političko djelovanje obje strane.

Na kraju rasprave gosp. Soru je, uz odobrenje prisutnih učesnika, proglasio usvojenim Preporuke Političkog komiteta za 2016. godinu, u kojoj se navode reforme Unije za Mediteran.

Predsjedavajući Komiteta istaknuo je sljedeće: „Izabrao sam ovu temu jer živimo u vremenu kada znamo da treba udahnuti novi život u odnosima Unije za Mediteran, kako bismo se izborili s prijetnjama koje se dešavaju.“ Kada se govori o budućnosti politike susjedstva, istaknuo je da Sekretarijat Unije za Mediteran razmišlja o unapređenju budućih aktivnosti Unije za Mediteran, a u Evropskom parlamentu postoje ideje o izvršavanju reformi Parlamentarne skupštine Unije za Mediteran. Cilj Unije za Mediteran su projekti saradnje u regionu, te je, u vezi s tim, Unija izradila 36 projekata, čiji troškovi iznose 4 milijarde eura.

**Gđa Borione** navela je da, kada se spominje Mediteran, obično je to zbog nekih tragičnih dešavanja; migracija, izbjeglica, terorizma, ekstremizma, konflikata, uglavnom sigurnosnih pitanja. Međutim, postoje i mnogi drugi aspekti na Mediteranu. „Želimo da kreiramo mjesto gdje ćemo raspravljati o koegzistenciji kako bismo izgradili svijet gdje možemo u miru živjeti jedni s drugima.“ To je ono što Unija za Mediteran nastoji uraditi. Ona nastoji izgraditi platformu za dijalog i saradnju sa svim uključenim strankama i kreirati sinergije i partnerstvo kako bi se usavršio uticaj aktivnosti. Gđa Borione istakla je kako je Unija za Mediteran imala mnogo značajnih aktivnosti, te je od 2013. godine održano sedam ministarskih sastanaka na kojima se mnogo raspravljalo o pitanjima ekonomije, ali i o ostalim temama, kao što su: energija, okoliš, klimatske promjene, uloga žene u društvu. Vrlo značajan događaj bila je 20. godišnjica Procesa iz Barselone u novembru prošle godine, kojom su predsjedavali Federica Mogherini, visoka predstavnica Evropske unije za vanjske poslove i sigurnosnu politiku i zamjenica predsjednika Evropske komisije, i Nasser Judeh, ministar vanjskih poslova Hašemitske Kraljevine Jordan. Kopredsjedavajući su potvrdili da podržavaju jačanje regionalne saradnje kao dio generalnih reformi politike susjedstva Unije za Mediteran. Unija za Mediteran mora biti ključna u radu politika i regionalnih projekata. Gđa Borione

predstavila je 41 projekat s oko 5 milijardi eura, predviđenih za 3 glavne oblasti: 1) razvoj društva i povećanje broja zaposlenja mladih; 2) projekti u vezi s energijom, okolišem, održivim razvojem, transportom; 3) uloga žena. Prije svega, ono što Unija za Mediteran pokušava uraditi jeste jačanje političke dimenzije njihovog rada. „Ono što radimo imat će uticaj na zemlje regiona.“ Drugo, potreba da se doprinese regionalnoj stabilnosti, koja je uzrok svih loših dešavanja u regionu. Pružiti nadu mladim ljudima, osiguravajući im posao, obuke i obrazovanje. Sve to se može postići stvaranjem velikog partnerstva unutar velike porodice Unije za Mediteran koju parlamentarci predstave u Parlamentarnoj skupštini. Naravno, mir igra glavnu ulogu. Ključni partner u radu Unije su parlamentarci. Unija će rado saslušati sve prijedloge parlamentaraca. Zbog toga je jako bitno da su parlamentarci upoznati s konkretnim projektima na terenu. Gđa Borione poziva parlamentarce da se pridruže ako smatraju da se neki projekti mogu primijeniti u njihovoj zemlji. Također, Unija želi proširiti uticaj na ostale regione u Mediteranu. Želi povezati dvije različite dimenzije, a to su politička orijentacija i konkretni projekti na terenu. Želi doprinijeti izgradnji stabilnosti i mira na Mediteranu.

U raspravi o dešavanjima u Siriji učesnici su razmijenili mišljenja o izbjegličkoj krizi koja ima veliki uticaj na stanovništvo euromediteranskih zemalja. Poslanik iz jordanskog parlamenta istakao je da je Jordan primio najviše izbjeglica, oko 2 miliona, kojima je potrebno osigurati sva neophodna sredstva za život. Samim tim, zemlja je ujedno otvorila vrata i terorizmu. Predstavnik turske delegacije istakao je kako njihovu zemlju čine izbjeglice, te da u Evropskoj uniji ima zemalja koje su bogatije od Turske, ali neće da prihvate izbjeglice. Evropska unija pruža finansijsku pomoć, ali to nije dovoljno. Poslanik iz grčkog parlamenta naglasio je da samo sirijski politički mirovni proces zasnovan na principima Ženevskog procesa, u skladu s Rezolucijom Vijeća sigurnosti UN-a, može vratiti stabilnost u zemlji.

**Michael Docherty** istakao je kako je situacija u Siriji najveća humanitarna i izbjeglička kriza od II. svjetskog rata. Sirija je sada na nivou od 1970. godine i stanovništvo je primorano da napušta domove zbog konflikata i teške ekonomske situacije. Iznio je podatak da su institucije Evropske unije potrošile više od 5 milijardi eura od početka krize za humanitarnu pomoć Siriji.

Pripremila:

Lara Borovina,

sekretar Delegacije PSBiH u PSUzM

Dostaviti:

- naslovu
- Ministarstvu vanjskih poslova BiH
- a/a